

# Službeni glasnik BiH, broj 41/13

Na osnovu člana IV 4.a) Ustava Bosne i Hercegovine, Parlamentarna skupština Bosne i Hercegovine na 44. sjednici Predstavničkog doma, održanoj 14. marta 2013. godine, i na 29. sjednici Doma naroda, održanoj 22. maja 2013. godine, usvojila je

## ZAKON

### O IZMJENAMA I DOPUNAMA ZAKONA O UPRAVNOM POSTUPKU

#### Član 1.

U Zakonu o upravnom postupku ("Službeni glasnik BiH", br. 29/02, 12/04, 88/07 i 93/09), u PRVOM DIJELU - OPĆE ODREDBE, tačka I. OSNOVNA NAČELA, naziv podtačke 6. i član 6. mijenjaju se i glase:

#### **"6. Načelo pristupa informacijama i zaštite podataka**

#### Član 6.

(1) Organi uprave i institucije koje imaju javna ovlaštenja dužni su strankama omogućiti pristup potrebnim podacima, propisanim obrascima, internetskoj stranici organa uprave i pružiti im druga obavještenja, savjete i stručnu pomoć.

(2) U postupku se moraju zaštititi lični i tajni podaci u skladu s propisima o zaštiti ličnih podataka, odnosno tajnosti podataka."

#### Član 2.

U članu 35. stavu (1) iza tačke 4) dodaju se nove tač. 5), 6) i 7), koje glase:

"5) ako je službeno lice sa strankom ili licem ovlaštenim za zastupanje stranke u bliskom ličnom odnosu;

6) ako je službeno lice sa strankom u privrednom ili drugom poslovnom odnosu;

7) ako službeno lice prema stranci postupa diskriminirajuće."

#### Član 3.

U članu 38. stavu (6) iza riječi "zaključkom" dodaju se riječi: "u roku osam dana od dana podnošenja zahtjeva za izuzeće, odnosno od dana dostavljanja obavještenja organu nadležnom za rješavanje o izuzeću".

#### Član 4.

U članu 46. iza stava (2) dodaje se novi stav (3) koji glasi:

"(3) Zaključak iz stava (2) ovog člana dostavlja se nasljednicima, odnosno pravnim sljednicima. Kada nasljednici, odnosno pravni sljednici nisu poznati organu, zaključak će se javno objaviti u "Službenom glasniku BiH"."

#### **Član 5.**

Iza člana 60. dodaje se novi član 60a. koji glasi:

"Član 60a.

Kada organ primi podnesak na stranom jeziku ili pismu koje nije u službenoj upotrebi, službeno lice će bez odgađanja tražiti od stranke dostavljanje prijevoda podneska i za to odrediti primjeren rok, a ako to stranka ne učini u određenom roku, smatrat će se da podnesak nije podnesen."

#### **Član 6.**

Iza člana 72. dodaje se naslov i novi član 72a., koji glase:

"5. Obnavljanje (rekonstrukcija) spisa

#### **Član 72a.**

(1) Ako se pojedini spisi upravnog postupka izgube, oštete ili unište, prema potrebi će se pokrenuti postupak za obnovu spisa (rekonstrukcija).

(2) Postupak za obnovu spisa provodi organ nadležan za rješavanje u toj upravnoj stvari.

(3) Postupak za obnovu spisa pokreće se na zahtjev stranke ili po službenoj dužnosti.

(4) Rješenje o obnovi spisa donosi rukovodilac organa ili lice koje on za to ovlasti.

(5) Pri obnovi spisa obnovit će se samo oni dijelovi spisa koji su važni, s obzirom na razloge zbog kojih je odobren postupak za obnovu. Spisi se obnavljaju na osnovu prijepisa nestalih, oštećenih ili uništenih podnesaka kojima raspolažu stranke ili organ, podataka iz glavnih i pomoćnih knjiga evidencije, u skladu s pravilima o dokazivanju.

(6) Postupak za obnovu spisa neće se provesti, ako je protekao propisani rok do kojeg se čuvaju spisi određene upravne stvari.

(7) Troškovi koji nastanu obnovom spisa nadoknađuju se iz budžeta organa uprave koji vodi postupak."

#### **Član 7.**

U članu 120. stavu (1) broj: "122" zamjenjuje se brojem: "118".

## Član 8.

U članu 121. iza stava (1) dodaju se novi st. (2) i (3), koji glase:

"(2) Kada službeno lice utvrdi da ne postoje uslovi iz stava (1) ovog člana, donijet će zaključak kojim će odbaciti zahtjev stranke.

(3) Protiv zaključka iz stava (2) ovog člana može se izjaviti posebna žalba u skladu s članom 212. stav (1) ovog zakona."

## Član 9.

U članu 123. stav (1) prva rečenica mijenja se i glasi:

"Stranka odustaje od svog zahtjeva podnošenjem izjave u pisanoj formi koju daje organu koji vodi postupak, usmeno na zapisnik ili elektronskim putem."

## Član 10.

U članu 164. iza stava (2) dodaje se novi stav (3), koji glasi:

"(3) Kada je svjedok maloljetno lice, saslušat će se uz prisutnost zakonskog zastupnika."

## Član 11.

U članu 214. u stavu (2) riječ i broj: "i 2." brišu se.

## Član 12.

U članu 230. iza stava (2) dodaju se novi st. (3) i (4), koji glase:

"(3) Ako prvostepeni organ nakon poništenja rješenja od drugostepenog organa donese novo rješenje protivno pravnom shvatanju drugostepenog organa ili primjedbama drugostepenog organa u vezi s postupkom, pa stranka izjavi novu žalbu, drugostepeni organ dužan je poništiti prvostepeno rješenje i sam riješiti upravnu stvar.

(4) Drugostepeni organ dužan je da o postupanju prvostepenog organa obavijesti upravnu inspekciju radi pokretanja prekršajnog postupka."

## Član 13.

U TREĆEM DIJELU - PRAVNI LIJEKOVI, u odjeljku B) VANREDNI PRAVNI LIJEKOVI, u tački XVI. POSEBNI SLUČAJEVI PONIŠTAVANJA, UKIDANJA I MIJENJANJA RJEŠENJA, podtačka **2. Zahtjev za zaštitu zakonitosti** i član 251. brišu se.

## Član 14.

## **Član 285. mijenja se i glasi:**

"Član 285.

(1) O rješavanju u upravnim stvarima vodi se službena evidencija.

(2) Evidencija iz stava (1) ovog člana sadrži podatke o: broju podnesenih zahtjeva; broju pokrenutih postupaka po službenoj dužnosti; načinu i rokovima rješavanja upravnih stvari u prvostepenom i drugostepenom postupku; broju poništenih, odnosno ukinutih upravnih akata i broju odbačenih zahtjeva, odnosno obustavljenih postupaka.

(3) Način iskazivanja podataka iz stava (2) ovog člana propisuje Ministarstvo pravde Uputstvom o načinu iskazivanja podataka u godišnjim izvještajima u organima uprave Bosne i Hercegovine o rješavanju upravnih stvari u upravnom postupku (u daljnjem tekstu: Uputstvo).

(4) Podatke iz stava (2) ovog člana iskazane na način propisan Uputstvom iz stava (3) ovog člana organi su dužni dostaviti jednom godišnje Ministarstvu pravde - Upravnom inspektoratu, najkasnije do 31. januara tekuće godine za prethodnu godinu.

(5) Na osnovu dostavljenih podataka organa uprave i institucija koje imaju javna ovlaštenja, Ministarstvo pravde - Upravni inspektorat sačinjava godišnji izvještaj o rješavanju upravnih stvari u upravnom postupku i dostavlja Vijeću ministara Bosne i Hercegovine najkasnije do kraja februara tekuće godine za prethodnu godinu."

## **Član 15.**

## **Član 286. mijenja se i glasi:**

"Član 286.

Ministarstvo pravde donijet će uputstvo o obrascima u upravnom postupku u roku 60 dana od dana stupanja na snagu ovog zakona."

## **Član 16.**

(1) U članu 289. stavu (1) iza tačke 14) dodaje se nova tačka 15), koja glasi:

"15) ako ne dostavi izvještaj o rješavanju upravnih stvari u upravnom postupku u propisanom roku (član 285. stav (2))."

(2) Dosadašnje tač. 15) i 16) postaju tač. 16) i 17).

## **Član 17.**

Ovaj zakon stupa na snagu osmog dana od dana objavljivanja u "Službenom glasniku BiH".

Broj 01,02-02-1-7/13  
22. maja 2013. godine

Sarajevo  
Predsjedavajući  
Predstavničkog doma  
Parlamentarne skupštine BiH  
Dr. **Božo Ljubić**, s. r.

Predsjedavajući  
Doma naroda  
Parlamentarne skupštine BiH  
**Sulejman Tihić**, s. r.